

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 416164 21 St
Tuzla, 16.03.2022.godine

OPĆINSKI SUD U TUZLI, sudija Antonela Đaković, u postupku prethodnog ispitivanja prijedloga za otvaranje stečajnog postupka nad dužnikom „GROMEKS“ d.o.o. za građevinarstvo i usluge Srebrenik, ul. Kiseljaci bb, koje u svom sastavu ima Podružnicu pod nazivom: „GROMEKS“ d.o.o. za građevinarstvo i usluge Srebrenik, Podružnica broj 1, Osmana Derviševića bb, Brčko Distrikt, zastupanog po punomoćniku Enveru Hogiću, advokatu iz Tuzle, dana 16.03.2022. godine donio je slijedeće,

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom privrednog društva „GROMEKS“ d.o.o. za građevinarstvo i usluge Srebrenik, ul. Kiseljaci bb, koje u svom sastavu ima Podružnicu pod nazivom: „GROMEKS“ d.o.o. za građevinarstvo i usluge Srebrenik, Podružnica broj 1, Osmana Derviševića bb Brčko Distrikt.

Za privremenog stečajnog upravnika imenuje Besim Hamidović iz Zvornika, Križevici 173, Gušteri.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju, a naročito:

- **obezbijediti imovinu dužnika i starati se o istoj,**
- **ima ovlaštenja da uđe u poslovne prostorije dužnik i provede neophodne radnje,**
- **utvrditi da li postoji razlog za otvaranje stečajnog postupka,**
- **ispitati da li će imovina stečajnog dužnika pokriti troškove stečajnog postupka,**
- **utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka i**
- **uraditi kontrolu poslovanja stečajnog dužnika.**
- **kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.**

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e, te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Srebreniku i Službi za geodetske i imovinsko-pravne poslove Grada Srebrenik, radi upisa zabilježbe otvaranja prethodnog postupka.

O b r a z l o ž e n j e

Predlagač – povjerilac Hazim Muratović iz Srebrenika, putem punomoćnika Envera Hogića, advokata iz Tuzle, podnio je dana 22.12.2021. godine ovom sudu prijedlog za otvaranje stečajnog postupka nad privrednim društvom „GROMEKS“ d.o.o. Srebrenik zbog platežne nesposobnosti stečajnog dužnika, jer je društvo obustavilo sva plaćanja prema povjeriocima, a navedeni povjerilac ima pravni interes da provede stečajni postupak jer mu je navedeni dužnik dužan novčani iznos od 607.592,66 KM.

Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača u smislu odredbe člana 58. stav 1. i 2. Zakona o stečaju i da je isti dopušten, obzirom da je predlagač uredio prvobitno podneseni prijedlog shodno rješenjima suda od 31.01.2022.godine i od 10.02.2022.godine, zakazao je ročište za saslušanje povjerioca kao podnosioca prijedloga i dužnika. Na ročištu održanom dana 10.03.2022.godine punomoćnik predlagača-povjerioca je izjavio da ostaje kod podnesenog prijedloga za otvaranje stečajnog postupka, obzirom da su računi dužnika blokirani, a predlagaču je lično poznato da su svi radnici iz sastava „Gromeks“ d.o.o. Srebrenik na zahtjev direktora prebačeni u druge firme, tako da se ni jedna više preuzeta obaveza za gradnju objekata i završetak obaveza po tom osnovu ne izvršava, a povjerilac ima pravni interes obzirom da mu je poslovni subjekt „Gromeks“ d.o.o. Srebrenik dužan iznos 607.592,66 KM. Društvo ne radi, svi radnici su otpušteni, a društvo ima nepokretnu imovinu. Punomoćnik dužnika je izjavio da po njegovom mišljenju nisu ispunjeni uvjeti za otvaranje stečajnog postupka, jer povjerilac nije dokazao vjerovatnost potraživanja kao prvi razlog za otvaranje stečajnog postupka, niti da postoji drugi kumulativni razlog obzirom da računi dužnika nisu u blokadi duže od 60 dana neprekidno, a shodno odredbama Zakona o stečaju. Također je izjavio da su osnivači firme „Gromeks“ predlagač Hazim Muratović i njegov brat Čazim Muratović sa iznosima od 50%, te da više nisu mogli zajedno poslovati, zbog čega je predlagana statusna promjena i međusobna isplata udjela, ali dogovor nije postignut.

Predlagač – povjerilac je putem punomoćnika dana 15.03.2022.godine dostavio sudu dokaz o uplati predujmljenih sredstava za finansiranje prethodnog postupka u iznosu od 10.000,00 KM.

Na osnovu priložene dokumentacije i to: Notarski ovjerena kopija ugovora o pozajmici između Muratović Hazima i „Gromeks” d.o.o. Srebrenik od 05.09.2019.godine, na iznos od 124.702,00 KM; Notarski ovjerena kopija ugovora o pozajmici između Muratović Hazima i „Gromeks” d.o.o. Srebrenik od 09.09.2019.godine, na iznos od 124.702,00 KM; Notarski ovjerena kopija ugovora o pozajmici između Muratović Hazima i „Gromeks” d.o.o. Srebrenik od 10.03.2020.godine, na iznos od 200.000,00 KM; Notarski ovjerena kopija ugovora o pozajmici između Muratović Hazima i „Gromeks” d.o.o. Srebrenik od 12.03.2020.godine, na iznos od 237.682,21; Analitička kartica konta za period od 01.01.2019. do 31.12.2019.godine; Analitička kartica konta za period od 01.01.2020. do 31.12.2020.godine; Analitička kartica konta za period od 01.01.2021. do 31.12.2021.godine, sve tri sa datumom štampe 02.02.2022.godine; Izvještaj o računima poslovnog subjekta izdat od Centralne banke BiH od 03.02.2022.godine; Aktuelni izvod iz sudskog registra od 03.02.2022.godine; Bilans uspjeha za period od 01.01. do 31.12.2021.godine, Bilans stanja na dan 31.12.2021.godine i Izvještaj o računima poslovnog subjekta izdat od Centralne banke BiH od 22.02.2022.godine, predlagač je učinio vjerovatnim platežnu nesposobnost dužnika.

Na osnovu podnesene dokumentacije i saslušanja punomoćnika predlagača – povjerioca i punomoćnika dužnika, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Službene novine Federacije BiH”, br.53/2021.).

Odluka iz stava 3. ovog rješenja donesena je temeljem odredbe člana 63. pomenutog zakona, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. istog zakona.

Na osnovu navedenog, temeljem citiranih odredbi zakona, sud je odlučio kao u izreci rješenja.

Sudija
Antonela Đaković

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, računajući od petog dana od dana objavljivanja u „Službenim novinama FBiH”. Žalbu mogu uložiti stečajni dužnik i privremeni stečajni upravnik. Žalba se podnosi Kantonalnom sudu putem ovog Suda.